

四庫全書

集部

欽定四庫全書

石倉歷代詩選卷三百七十八

明 曹學佺 編

明詩次集十二

韓宜可

馮虛子歌

馮虛子清且脩  
藐觀萬物如浮漚  
金莖一柱出天表  
青田孤鶴橫高秋  
大鵬搏風九萬里  
下視塵寰渺煙水  
蜃

樓縹緲危接天夜半月明常獨倚四方上下隨所之茫  
茫積氣將焉依居無室廬轍無迹鼇背豈有三山為空  
中雞犬劉安宅我亦因之寄遐適飛光浩浩不少留回  
首人間非宿昔列子禦風已千載莊生化蝶今安在水  
中漉月亦好奇管裏窺天竟無底太虛太虛問不應銀  
河耿耿凝寒水丹臺紫府不可登願歸大化何由馮

題江南秋晚圖

錢塘江頭潮汛來我時放棹胸次開西風蕭蕭木葉脫

夕陽漸低沙鳥迴劃然一嘯海天碧吳越西山雲盡白  
圖中風景偶相同嗟我胡為久行役

題蓬萊深處

聞道蓬萊別有春五雲深處隔凡塵松迷鶴逕渾無路  
花暗簫聲不見人滄海日華翻貝闕三山霞氣逐飈輪  
劉郎自是神仙侶何用天台更問津

送王格心考滿

冠蓋紛紛曉出城城頭送別若為情青雲莫謂歸年少

白石從來締舊盟芳草東風沙上馬碧山遲日柳邊鶯  
子今休恨先華髮千載猶聞丙少卿

酒船圖

春波橋頭水半竿畫船如馬觸狂瀾平生常恨江湖小  
醉卧不知天地寬隔岼好山青隱隱環洲芳樹綠漫漫  
懸知賀監歸來日一曲晴光五月寒

五華山圖

五華之山山上頭俯視江東如浮漚豈無四萬八千丈

亦有五城十二樓翠蕖影落中天曉玉柱光含大地秋  
何日相從陪杖屨西風林下一長謳

小景

春色來何處桃花路欲迷為言垂釣者中有武陵溪

題畫

西風洞庭波落日蒼梧野挈茲瑤芳枝將以遺行者

畫梅

湖西開徧梅千樹正在東風十日前月落參橫誰是伴

數聲孤鶴叫清妍

題畫

山上白雲如水流  
隔溪紅葉蚤知秋  
幾年不復南柯夢  
獨坐西風看白鷗

附胡粹中

名由以字行已  
下俱山陰人

古意

四時既平分  
二氣亦均施  
草木悅春暉  
霜露忽凋瘵  
舒慘貴適宜  
好惡初不計  
恩多易生怨  
威褻忘敬畏  
治世

以大德小惠匪所貴賢哉諸葛公斯言深有味

詠懷

惠風扇微和天宇亦澄霽欣欣草木榮歷歷江山麗  
開渠泉脉動入澗水聲細交交飛桑扈角角聞雉  
閒居讀古書俛仰唐虞際聖賢吾所師其人惜已逝

又

君子居高位小人閒草野借問古來人誰為百歲者  
為樂當及時芳春足游冶一生如夢寐萬事盡虛假  
憂來



對明鏡清淚數行灑獨有七絃琴情性可陶寫

題青山白雲圖

青山之中有白雲古今能畫者數君南宮房山去已久  
高步獨數朱山人山人于畫但適意閒中翰墨恣遊戲  
下筆江山千萬重妙入天機奪元氣昨日王家飲酒醒  
寫出會稽山陰之蘭亭尖峰削圭插天出長松偃蓋垂  
雲青想當暮春三月初天氣清明景物舒流觴曲水發  
高詠一代名士今何如涼煙夕草總陳迹留得斯文數

行墨魯魚亥豕何其多一片誰存晉朝石右軍孫子復  
才賢宦遊萬里西南天石田茆屋春雨裏落花啼鳥東  
風前我亦越王臺下客脫冠偶此西夷謫雲門古寺若  
耶溪老眼畫中看歷歷何時與爾得歸田南湖北宅居  
相連不惜東山謝公屐且迴雪夜子猷船

發松林驛

晨發松林驛蒼蒼百里深日高猶暝色風靜自韶音幽  
鳥向人語流泉清我心何因素軒下一聽老龍吟

九日泊舟潯陽

去年重九日為客，孟嘗門對菊，動清酌，吟詩開素軒。流光空自惜，別意與誰論。倚棹潯陽郭，黯然消旅魂。

夢遊昆陽海口

碧鷄山下路，清夢記曾遊。怪石行驚馬，輕風穩送舟。轅門叨下客，行縣有諸侯。萬里遙相望，聊登江上樓。

李得全家賞薔薇

不喜尋花柳，生憎泥酒杯。因君以文會，老我亦能來。未

數金錢菊休誇蠟辦梅東山不到久幾度為誰開

謝惠酒

美醪能遠致塵抱豁然開起向窗前坐風從竹下來莫  
思身外事且進手中杯飲罷復高卧冥心若死灰

次韻

靜觀天地情浩劫運元精雷動蟄蟲起雨餘新水生老  
懷寬仗酒午夢短聞鶯身外元無物浮名真可輕

又

昨夜霜初重他方葉又黃  
蛩聲悲月冷客意怯風涼  
孤嶼漁村外荒郵野戍傍  
因思舊遊處魚稻滿江鄉

次韻晚入五華寺

向曉尋幽寺明霞飛遠林  
四山新雨歇一徑綠苔深  
松老齊僧臘泉鳴梵音階  
前兩馴鹿去住識禪心

挽光古遠先生

獨騎玄鶴上丹丘為記鈞  
天白玉樓詩板刊成應自校  
草書零落有誰收可能覓  
酒府中去無復携筇寺裏遊

欲寄東風一行淚蜀江那肯向西流

挽鑑機先和尚

曾將一葦渡瀛洲信脚中原萬里遊日出扶桑極東處  
雲歸溟海最西頭經留髻几香猶爇棋歛紋楸子未收  
老我飄蓬江漢上幾回中夜惜湯休

春暮

老眼看春得幾時少陵從此典朝衣煙籠芳苑迷蝴蝶  
月落空山叫子規鄉國音書秋水濶江湖親識曉星稀

沙邊白鳥能相近應為年來已息機

次韻

暖風晴日正春和老眼看花感興多久悟宦情如蝶夢  
已將心事付鷗波窗開野水新栽柳身著宮衣舊賜羅  
誰似山公習池上春遊日日候鳴珂

次韻坐法正寺

野殿深沈夏涼博山一炷水沈香素琴彈徹梅花引  
山自蒼蒼水自長

楊彝

字宗彝

與友人同飲山閣

浮雲有聚散山色無古今  
牀頭黃金不足貴惟有管鮑  
情何深與君久相別相見還  
復離鴻鵠肆遠志燕雀焉能  
知君不見白髮難再黑水清  
終可渾向來朋舊半存沒  
只今世態徒紛紜君當高歌  
我起舞直須醉倒花前樽

寄桂宗敬



每見臨安客，渾無故舊書。  
客情多易老，鄉夢豈全疎。  
夜月鸞飛遠，邊雲雁過初。  
陶然樽酒外，幽趣問何如。

次松雨平先生韻

露下梧桐客夢醒，夢中猶記在滇城。  
尋山翫水連三月，聽雨吟風過二更。  
斑白近來添老態，文章千古總虛名。  
何時更剪西風燭，重把新詩與細評。

謝惠華陽巾

仙人贈我華陽巾，鶴髮輕籠雪色新。  
行近花間添老態，

照來鏡裏覺精神寧論錦里誇烏角絕勝柴桑岼白綸  
安得畫工圖小像水邊林下乞閒身

謝斗南禪師惠竹杖

扶桑禪子下蓬萊携得仙人竹杖來瘦節只疑同鶴骨  
虛心猶恐是龍胎衰年正藉扶持力異日須知變化材  
不怕石頭溪路滑月明隨意步蒼苔

南城偶題

城南好山何太幽人家對門溪水流春禽啼樹野花落

雪瀑掛崖嵐翠浮長鋤自可斲靈藥短筇何必尋丹丘  
一聲清嘯暮天碧松頂月明人倚樓

劉公柳溪詩

公庭晏坐無俗情楊柳蔭門春水生綠陰滿地惜春晚  
飛絮撲簾疑雪聲解鞍樹下看洗馬流杯石上聽啼鶯  
當今論治用材傑歸來未許陶淵明

寄鄭氏養拙齋

貴竹城中養拙齋開窗樹色映丹崖常時有約論幽事

幾歲無書慰老懷  
身逐暝雲登蜀道  
夢隨寒雨落秦淮  
英才況出功臣裔  
早晚除書下玉階

送人還鄉

五十離鄉七十歸  
居民城郭是耶非  
青山依舊吾廬在  
白髮應憐故友稀  
隣舍定携新醞酒  
兒童不識舊戎衣  
到家若有相思字  
為寄明年春雁飛

蚤起

一聲殘角數聲雞  
南斗高懸北斗低  
多少行人度關去

東方曙色尚淒迷

朱絢

字士林

雜詩

天寒苦日短白露變為霜  
行行出門去周道悠且長  
衰草被荒郊陰雲翳重岡  
俯觀溪流涸仰視鴻雁翔  
豈不懷所思慷慨熱中腸  
乃知四時間代謝本尋常

題黃花驛觀湘亭

湘水清可觀新亭翼弘敞  
面江瞰空濶據地得高爽  
遠

樹雜煙靄斷崖連篠蕩雁影隨微茫漁歌答清響三閭  
不可弔蘭佩空想像二女時出遊翠蓋移惚恍繫予頗  
好古到處寄幽賞佇目更如何澄波滌塵鞅

李毛騶歌次王汝玉韻

李唐天廡拳毛騶蹙踏倒影凌飛霞侯家神駿豈遺種  
徧身細纈旋螺花端陽射柳轅門道紫燕身輕拂柔草  
鏤膺虎韞錦障泥響馬羣中看表表得雋歸來紅日西  
汗溝珠血濡霜蹄解鞍滾罷起噴振奚奴牽入垂楊堤

南陌觀花宜按轡戲共王孫簇芳騎烏衣朱雀足追遊  
自古金陵說佳麗皇風萬里清關河尚方兵仗繡不磨  
騶兮騶兮免負戈日日朝天鳴貝珂

月下獨步有感

白月在青天照見地上影城荒鼓角悲露重衣裳冷草  
砌蛩亂呼松巢鶴頻警徘徊徬徨發我心內省

出鬼門關

北流仍在望喜出鬼門關自幸身無恙從教髮已斑昔

人多不返今我獨生還回首瓊山縣昏昏瘴霧間

寄伯禮兄長

春來見綠樹日夜憶連枝夢斷一千里愁連十二時  
鵲飛雨急鴻雁入雲遲無奈音書絕其如鼓角悲

夜坐有感

夜分燈燼漏聲遲掩卷茫然太不支三月鶯花春去後  
半窗風雨客愁時相如未遂題橋志季子空持刺股錐  
辛苦人生成底事姓名留得世間知



過洛社留寄李耕隱

故人近住林之東相望草堂雲氣中  
舊時松竹想無恙暇日琴樽誰與同  
作賦應能繼潘岳隱耕元不讓龐公  
過門不入因何事兩鬢塵埃愧轉蓬

題淘金驛丞謝子良清隱書房

驛官近日逢迎少清隱何妨結草堂  
門對好山蒼霧濕窗連脩竹翠雲涼  
侍童解誦閒居賦過客求書急就章  
愧我驅馳塵滿面濯纓為爾詠滄浪

雨中過韶州

船下韶瀧日欲晡  
四山雲起景模糊  
沙鷗衝雨頻來去  
汀樹迷煙半有無  
作客又驚三月暮  
思家其奈一身孤  
愁懷浩浩渾如醉  
獨倚篷窗聽鷓鴣

題趙師古梅林生卷

金華山人有梅癖  
託物自號梅林生  
欲喚師雄談醉夢  
恨無和靖結詩盟  
筆端幻出先春意  
胸次包含太古情  
我亦從來松竹操  
願言與子保幽貞

竹枝歌送蕭月潭

子期逝矣誰知音堪與茫茫勞我心  
石壇後夜好明月憶爾琴中飛佩吟

題淘金驛

淘金驛前春色多紅桃綠柳映清波  
江南獨客悲時序奈此東風淡蕩何

過君山

昔人曾與白雲遊我欲登臨一寫憂  
風滿征帆停不得

煙波回首思悠悠

題五羊驛

尉陀歸漢憶當時  
千古猶誇陸賈辭  
今日蠻夷俱向化  
我來無語獨題詩

過廬山

廬山萬丈倚青冥  
翠壑丹崖列畫屏  
不得維舟恐遊覽  
紅塵滿面愧山靈

曾烜

字日章

賦旭庵

晨光散餘靄大明麗東方伊人慎修為從容整冠裳四  
簷萃虛白開卷思遑遑寸陰惜輕逝宴安當預防天君  
貴操存待旦知自強矯首對初暉盎然樂無央孰云虎  
臣喬踐迹能升堂勗哉勿異途黽勉趨周行

答朱文榮

南風送好音珍重比南金寂寞經年別淒涼萬里心敝  
裘仍戀體華髮已盈簪誰識鄉關念時時動起吟

搗衣曲

搗衣復搗衣空閨月冷風淒淒  
風前高下聲零亂客中  
聽得偏腸斷斷腸應折大刀頭  
破鏡上天過一秋更深  
力盡聞私語夫戍邊城幾寒暑  
新衣歲歲寄征人寄到  
邊城衣不新客行雖遠有歸日  
久戍何時見家室願令  
今古無別離夫耕婦織常相隨

老龍引子歸潮圖

海門秋氣橫江來怒濤殷地如奔雷  
蒼龍教子習潮勢

排風噴雪煙雲開憶昔深潭事冲舉直上穹霄輕一羽  
曾噓數滴翻瓢漿散作九州三日雨只令回顧恐潛蹤  
引子不敢施神通却愁幼小易飄忽一瞬萬里天無功  
我聞靈物多奇異潛飛大小皆隨意畫師恐是張僧繇  
寫向生綃若真致龍令育子猶世人古來有欲皆可馴  
何當重起秦龍氏愛養留作商岩臣

秋夜偶成

隴上俄聞梁父吟異鄉情緒獨難禁寸錐未脫囊中穎

斷木誰修爨下琴  
夜雨驚殘歸國夢  
秋風催動搗衣砧  
欲憑樽酒忘羈恨  
酒後那知恨轉深

贈雲教授

誰傳禮樂繼前王  
庠序昭回草木香  
漢道欲昌書再挾  
秦灰未冷德先涼  
千年廟貌乾坤大  
萬古人倫日月長  
共喜臯比開講席  
佇看池上集鸞凰

贈日本僧演此宗

達磨居嵩九載期  
此宗寂寂有誰知  
生從日本精三藏



老向雲南禮六時香滿墨池臨舊帖花明春塢詠新詩  
別來應有驚人句好寄東風慰所思

舟至辰陵磯與楚百戶等言別

江到荆湘兩派分客情無奈况離羣爾從三峽迎春水  
我過重湖望楚雲白帝至今啼蜀魄蒼梧何處弔湘君  
孤舟夜向巴陵泊一曲商歌不忍聞

寄友人

與君離濶十年餘兩過江濱候起居咫尺猶如千里別

飄零不寄一行書何時夏口同傾蓋此日黃門好曳裾  
若問故人何似者髭絲今已不勝梳

秋夜

何處偏能斷客腸西風吹雨到池塘都將萬疊青山恨  
散作離愁一夜長

題倪雲林畫

梁鴻溪上草堂幽紅葉黃花幾度秋回首雲林人不見  
西風落日思悠悠

石倉歷代詩選卷三百七十八

欽定四庫全書

石倉歷代詩選卷三百七十九

明 曹學佺 編

明詩次集十三

商輅

蘭蕙圖

蘭蕙比君子其德為不孤人物雖云異氣味乃匪殊托  
根深林下不與桃李俱妖艷任紛紛貞姿恒自如共言

王者香宜為禁苑居一朝移植後雨露恣霑需芬芳異  
凡卉馥郁盈天衢採擷足紉佩把玩堪怡娛發舒似遲  
晚蠲潔無終初誰將幽靜意寫此蘭蕙圖對之逐清賞  
塵慮焉能紆呼童出門巷止回俗士車

至日

佳節當長至相遇值休假主人重愛客開宴秉閒暇香  
醪發新筍時馥供美炙獸炭擁巨爐銀燭照高榭宗伯  
與司寇丰采殊醞藉同浙更同朝同命嵇呂駕于時一

陽復羣陰漸退舍皓月清光流此景天所借杯行不停  
手坐久寧問夜主賓管鮑儔才思李杜亞劇談意轉新  
勝味如啖蔗幸茲際熙洽皇風徧夷夏顧余菲薄資職  
業慚造化良會感知已素懷盡傾瀉醉後惜分携留詩  
一相謝

題春景山水

愛此佳山水春來景更妍四郊青嶂合孤岫白雲連地  
迥輪蹄絕峰危石磴懸小橋臨曲澗遠浦接平田鬱鬱

林間寺潺潺竹下泉桑麻凝暮靄榆柳繞晴川寶殿凌  
千尺茅堂敞數椽僧歸西嶺月漁釣北溪煙倒浸沈波  
塔閒橫古渡船樓高平見日松老不知年鳥度浮嵐外  
鷗飛落照邊吟筇芳草逕酒旆杏花天隔岸聞鶯語開  
軒待鶴旋砌苔深染黛林籟細鳴絃有路通仙境無塵  
遠市廛終依丹鳳闕未結赤松緣家山在圖畫觸目思  
飄然

挽胡忠安公

五紀朝廷士歸然鶴髮疎望尊周太保職重漢尚書捧  
日心常在包荒量有餘門牆儀範遠空自望懸車

應制西洋駒

天生駿骨真奇哉貢之遠自西洋來西洋神駒何所致  
雲霧晦暝初降胎身簇丹砂蹄削玉月鏡夾瞳耳批竹  
追風掣電氣如虹裔夷得此那敢畜當時皇祖御宸極  
德化覆冒西南國海不揚波條不鳴重譯來朝靡虛日  
豈無犀象與珠貝不貴異物貴良驥玉階控獻聖情怡



振鬣驕嘶如有意天閑自此識龍種駕駘一見覺神悚  
孳生歲歲蕃且息廐廐充牣如雲湧郊壇有事備威儀  
錦韉寶絡光陸離和鸞前道恣容與凡馬不許爭驅馳

山水

浮雲積翠山稜層煙波浩渺滄江橫就中風景如武陵  
又疑方壺與蓬瀛高人妙得丹青趣展素揮毫若神助  
巖峽峭絕瀉飛流嵐岫溟濛鎖雲霧楓榆隔岼羊腸遠  
漁舟蕩漾忘昏曉人間何處有此景願一登臨散懷抱

其二

蒼岷萬仞高插天銀河直與南溟連畫工繹思寫縑素  
天涯地角來筆端晴巒曉嶂空翠濕水色湖光渺無極  
依稀遠樹含紫煙隱隱平林帶秋色夢中忽向君山遊  
君山一髮青如蚪覺來披圖賦新句瀟湘雲夢清氣浮

九鷺圖

晴煙曉散垂楊堤垂楊嫋嫋臨清溪風景依稀二三月  
蘭苔杜若連芳蹊溪頭紛然集羣鷺形影相隨復相顧

翹沙戲渚咸自適界水衝風飛更舞飢則窺魚飽則栖  
弋羅不到無嫌猜參差態度形殊別綠楊深處恣徘徊  
孤高格瀟灑性不逐烏鳶不逐隼平生雅趣雲水俱一  
片閒心煙雨靜氤氲毛羽勝霜雪數聲叫徹滄波月宛  
如野鶴出塵埃回視凡禽總殊絕誰人巧奪造化工九  
驚寫入丹青中非惟潔白堪比德所貴體物存心胸乘  
時高奮搏風翮充庭久向鷗行立遙看洲渚渺茫茫日  
近蓬萊天咫尺

春景山水

春山寵從淨如掃楊柳依依春正好山頭不斷飛白雲  
山下時聞叫黃鳥高人卜築山水間樓居面面皆青山  
卷簾日長看圖畫閉門無夢來塵闌闌中紅塵深沒馬  
馬蹄不到青山下兩翁何處抱琴來良晤尋常共傾瀉  
東風入指拂桐絲高山流水誇絕奇千古遺音足清賞  
黃金何必鑄鍾期幸逢四海雍熙日才俊登庸皆遺逸  
弓旌行見下朝廷未許斯人永泉石

山水圖

畫師盤礴作筆勢寫出江山數千里崔嵬絕巘如摩空  
彷彿高巖起雲氣浮雲開處見山骨紫翠重重淨如洗  
飛泉落澗聽無聲幽谷含春如有意武陵此去疑不遠  
似有桃花出流水隔江依柳起涼風高窗面此雲山青  
客來相對坐忘倦似說平生遁世情我觀斯圖重太息  
清時誰肯終泉石桑弧蓬矢作男兒竹帛千春照芳績  
君不見當年伊尹耕有莘惓然一出安斯民

其二

生綃一幅高堂上彷彿名山勢千丈雲霞變態不可名  
掩映長流萬古清層江疊岫斷復續怒虎奔龍起還伏  
廓然天雨放初晴萬壑千巖漱寒玉雲山峨峨何壯哉  
珠林物外無纖埃長松百尺出幽澗飛橋橫跨山之隈  
携琴曳杖者誰子疑是山中招隱回君不聞蓬萊三山  
峰竄絕非人寰計來三千餘萬丈惟有飛仙日往還龍  
眠畫筆奪造化仙界移來指顧間公餘杜門無一事坐

對斯圖心自閒

獵騎圖秋景

薊門霜落悲秋草，葉飛滿地無人掃。  
鑾輿曉出明光宮，揚鞭走馬關東道。  
天閑十二分雁行，虎蹲豹躑爭低昂。  
戎袂吹風日杲杲，陣雲橫塞天茫茫。  
兔奔鹿馳何迫速，長劒短戟相追逐。  
蕭蕭響徹雲影寒，呦呦鳴透空山綠。  
野雉戛戛原頭飛，錦毛五色光陸離。  
翻身抽矢將欲射，巧力恐逐冰絃移。  
丹青一幅監前代，幾度桑田變滄海。

靈園靈沼尚可徵金城湯池將安在東龍行日西龍雨  
乾坤已屬大明主當今偃武更脩文世際雍熙侔舜禹

題夏珪山水圖

夾江山勢如削玉夾岼人家茅結屋屋頭挺挺多脩篁  
屋外垂垂楊柳綠漁舟款乃聲相續得魚沽酒聊自足  
就中高人歌席帽策騎前來訪幽躅

送龍孔目歸省

曉辭天陛出金臺仗劒分携亦壯哉玉署已看書最績



江亭暫共對離杯  
秋經冀北霜初凜  
冬去江南梅正開  
掃徧松楸無久戀  
都門指日候重來

送李繡衣督學

臺端久矣著蜚聲  
銜命新從冀北行  
政教已看歸掌握  
師生深喜得宗盟  
輶車到處秋風冷  
藻鑑懸時夜月明  
收拾棟梁應有待  
好抒忠赤答昇平

挽吳編脩母

堂北淒風捲素帷  
萱花一夕竟凋衰  
詞林有子登清秩

機杼無人理斷絲  
鏡掩香塵鸞影寂  
窗含明月鶴聲悲  
平生見說多賢行  
銘勒何慚太史碑

瑞蓮亭為建寧張太守賦

蓮亭瀟灑瞰清漪  
嫩綠新紅種滿池  
並蒂倚風嬌欲語  
雙花凝露淨還欹  
遠追周室未同穎  
近似漁陽麥兩岐  
和氣致祥應有自  
佳聲從此播明時

遊楊鴻盧南園次韻二首

別墅同追一餉歡  
喜陪車駕出朝端  
花飄紅雨三春暮

麥熟黃雲四野寬  
醺醺杯傾鸚鵡滑  
櫻桃盤薦水日寒  
遊歌何幸逢全盛  
仰祝鴻圖萬世安

其二

咫尺南園接上林  
共娛風景聚朝簪  
花因春後開還落  
水自溪分淺復深  
綵筆倚闌題樂事  
冰絃當座助歌音  
主賓歡洽難勝醉  
何用臨岐酒更斟

雪

朔風吹雪滿林端  
頃刻青山變玉山  
敝履尚思東郭趣

蹇驢應向灞橋還寒生短棹滄江濶光映疎櫺卷帙閒  
三白豐年今有兆農家從此盡歡顏

山水

雲山疊疊樹高低景色蒼茫望欲迷江上有舟人蕩槳  
林間無路石成蹊柴門晝掩車塵杳茅屋春來野鳥啼  
昭代徵賢勤束帛高才未許學幽棲

題山水圖

山間景物四時同松柏森森紫翠中案上書編閒白日

簾前花影動清風  
小橋靜看行人過  
野寺遙從曲逕通  
辟穀他年如有分  
肩輿還擬覓仙踪

送徐巡宰莆田

與君兄弟意綢繆  
不惜離筵重勸酬  
紅葉馬前牽別恨  
白雲江上動鄉愁  
舟移劍水腥風遠  
春到閩山瘴雨收  
況是莆陽文獻地  
宦情詩思兩悠悠

送楊大尹之官吳縣

九載江村喜撫循  
聲華從此動朝紳  
東吳剽劇須賢尹

北闕疇咨用老臣耕鑿會看民樂業絃歌有待俗還淳  
耒陽豈足淹龐統超擢懸知沐寵新

題鷺洲書舍

分符出鎮幾經秋結屋還依白鷺洲萬點霜花藏遠近  
四時煙水共清幽詩書滿架承遺澤事業潛心繼遠猷  
自是故家文物盛子孫賢達異常流

送曲阜孔大尹

令尹才華迥出羣烏紗銀帶荷君恩應知聖澤同天地

致使餘波及子孫學道可能忘祖訓推仁先欲庇同根  
公忭進士如相過好說深居遠俗喧

夏

屋外羣山如削葱屋頭翠柳清陰濃松根白鶴起欲舞  
藕花香散西湖風愛花少年顏如玉畫槳輕搖浪紋簇  
羽扇涼生香袖飄恍在若耶溪水曲

秋

一片秋光素如練滿山黃葉霜初染斯人中履晉風流

松竹閒依白雲歛筇杖兒童不暫離  
筆牀茶竈相追隨  
好似柴桑陶靖節歸來孰與同襟期

送羅翰撰歸省

三年史館已遷官千里親闈缺問安  
予告暫辭天上去  
承恩遙向日邊寬到時春酒堪為壽  
舞處斑衣足盡歡  
侃侃每聞懷直道會將民隱奏金鑾

送龍太守之毘陵

早從春試見雄文駐馬山中識使君  
曉闕承恩沾仗彩



寒窗敘舊對爐燠晉陵撫字多仁政江表聲華達上聞  
自是高才難久滯超遷還擬立殊勲

送鄭彥成之廣信

信州南去近鄉山便道爭看衣錦還蓮幕得賢資畫諾  
玉峰多暇稱躋攀半生勤苦塩齏味千里歌謠井臼間  
別後要知重會處天香兩袖覲龍顏

贈李其章還官

桐鄉二尹西昌彥為喜居官有政聲農樂耕桑勞勸相

士耽詩禮藉陶成九重奏最恩光重千里歸裝去路輕  
懸想到時秋正熟紛紛老穉盡相迎

山水

別墅樓臺俯碧灣柳陰深處隔塵寰主人無限登臨趣  
都在煙雲出沒間

梅

挺挺新枝冒雪開江南此種冠花魁天公有意憐幽獨  
特遣陽和到早梅

石倉歷代詩選卷三百七十九

欽定四庫全書

石倉歷代詩選卷三百八十

明 曹學佺 編

明詩次集十四

陳政

古風五首

昔賢秉高致守道恒若斯  
顏色似渥丹學業無專師  
晨夕不兼味冬春一布衣  
用世為霖雨居山偕鹿麋  
恬然

以處世不俗亦不羈遊心千載上樂命更知幾安得與  
若人遨遊江之湄

我愛李謫仙為人最高格壯語鬼神驚高歌天地窄醉  
呼管城子千人為辟易詎意白玉姿青蠅竟汙黑流竄  
彼一時垂輝靡終極

美人昔未見彼此天一方姿容瑩冰玉德音流輝光忽  
朝裁素書青鸞遠傳將蒼黃拆題封羅列雲錦章相思  
意無極約誓言何長感慨復感慨駕言命飛黃自從邂

迨間一笑傾衷腸相期瑤臺端雜坐飛瓊觴笙簧散好  
音嚶嚶協宮商光風于時至物意同春陽膠漆既云固  
歡樂奚可量言念君子心此情永難忘

北山有孤松閱歷幾千載根節固鐵石枝柯藹幢蓋華  
姿沃以青四序不週改山深無鳥雀天際聞竽籟我欲  
爰其下騁視風塵外縹緲懷滄洲逶迤阻瀛海地遠不  
易到扁舟欲何待

扶桑麗春日光彩散暘谷倉庚鳴喈喈欣欣榮卉木截

彼東郭山芳秀足遊目亦有南澗泉溫潔宜盥浴感值  
此時節洋洋動心曲行樂貴及時光陰難過復何當恣  
周遊遠近惟所欲

題陳廷器江山勝覽

曲士徇迂俗達人稱上流所以謝安石翫然樂佳遊偉  
哉司馬長聲迹半九州雅度既推重史才良獨優素心  
在山水欲為斯人謀今世廖元昭家居湘水頭由歷抵  
上國依稀見前修我當訪君衙扁舟效王猷

送夏處士歸浙

秋風逗江渚秋水有餘清感此深秋時惕然傷別情遙  
持一樽酒餞君東南城令器金閨彦朋遊盡豪英臨流  
為君歌鏘鏘金玉聲眷彼中林鳥拂然起孤征衆鳥戀  
故林交交飛且鳴人生各有志豈在利與名惟有杯中  
酒可以慰平生

雜詠二首

忽聞春光回將徧東南城卧病方在牀無由起相迎東



風入簾幕彷彿聞流鶯美人會相見庶幾道平生病起  
忽二旬春色殊已深崇蘭秀階下碧草交繁陰旭日遲  
遲升衆芳同照臨援琴未成調拂拭遲知音

其二

有客踵門來云自天南至喜是同鄉人殷勤問家事父  
母安高堂兄弟樂田里令我聞此言欣然欲忘寐官舍  
春晝長冲澹自成趣良朋日往來衷言以相語琴書既  
足樂得喪亦何預卓彼先民言庶幾永終譽

詠懷二首

采芷向東臯采蘭向幽谷采采結佩纓輝輝瑩金玉佩  
之躡雲衢迎風散芬馥內顧空自憐徘徊還躡躅

又

我有盤龍鏡炯炯凝清光亦有高陽劍秋水淬鋒鋌欲  
攜贈知己感慨意難忘但恐歲月晚抱此徒悲傷

哀平南為司訓郭君妻

平南古封邑山水天下奇誰知水山間訪故有餘悲結

髮事君子燕婉及茲時君領平南訓妾當從所之嘉合  
諒不偶偕老獲奚疑詎意方盛年世途生嶮巇胡藍哄  
豺虎咆哮薄城池鴛鴦忽驚散倉皇各東西孩提在中  
懷呱呱益淒其鋒刃轉陵脅死生從此辭白璧苟以汙  
雖生亦奚為厲聲叱兇暴濺血沾裳衣秋霜讓凜凜烈  
日同光輝哀哉若女英展也烈士規聖朝重化理激薄  
良在斯綸綍出中禁龍光賁天涯一死安足惜千載芳  
名垂

車遙遙

自君出門去驅車涉長道心送無所言但願歸期早如  
何歲復歲各在天一涯行役未有期相見知何時東風  
昨夜生苦惡萬片飛紅雨中落驅車何事逐風塵遠道  
思君安得聞

美女篇

南州美女嬌如花天然艷質輕鉛華脩眉皓齒鬢學鴉  
步摧壓鬢金鳳斜瓊瑤肌膚絕纖瑕繡屐錦袂蒸雲霞

卷三十八  
腰懸雙佩首六珈吐詞芬馥如春葩移蓮延佇當窓紗  
碧天雲門見姮娥容儀窈窕信莫加道傍觀者生咨嗟  
行人或過猶迴車媒氏通好何紛拏玉帛不備當奈何  
託身願得良名家鸞簫雙吹成配嘉主君中饋為調和  
百年燕婉期無它

將進酒

將進酒持勸君百年光陰若流水勸君滿飲須十分君  
不見石崇錦幃五十里何如子夏衣懸鶉豈論古人與

今人富貴貧賤同反真名流青史信足貴骨埋黃壤誰  
知聞起舞待明月高歌遏行雲勸君有酒且盡醉無僕  
僕爾勞心身

朝陽鳴鳳行

君不見朔風吹雲鯨海東曉珠飛出扶桑紅山巔鳴鳳  
聲一振百鳥喧啾皆下風我聞鳳凰產丹穴火德之精  
和氣鍾聳身五色炫文采舉翮萬里摩蒼穹回翔周覽  
始一集積石下有黃河通來儀舜韶協鳴岐周業隆方

今聖人御神極窮荒絕域皆來宗復從千仞覽德輝瑞  
應四海歌時雍瓊枝自有琳琅實食性豈與凡禽同鷗  
臬逐逐誰所放嚇以腐鼠何愚蒙

登樓歌

愛茲樓兮朝登忽陽春兮暮矣望美人兮不來渺澄江  
兮春水蘭桂發兮藹芳姿間寥寥兮聞鳥啼眇遙空兮  
雁北歸嗟美人兮來何時

題梅軒卷

軒前梅花開幾枝  
遠來速我梅軒詩  
浩然窮死逋仙逝  
落筆恐被梅花疑  
梅花自是江南物  
鐵石肝腸冰雪質  
羅浮別後今幾年  
夢裏猶疑見顏色  
何當樽酒造華軒  
濡毫申牘心悠然  
人間萬卉何足數  
坐對寒香詩百篇

謝安東山圖

晉轍已東牛繼馬名流  
誰復居林下  
何事東山若不聞  
握瑜高索當時價  
佳遊稱意隨所如  
當筵夾座皆名姝  
歌凝絲竹倚花聽  
詩琢琅玕行草書  
濟時元有經綸策



大壑蛟龍豈終蟄四十餘年樂遜心幡然一為蒼生出  
鹽梅登鼎手自和運屯其奈蒼生何鎮安風俗任才畧  
呻吟稍變為謳歌固知隱德寓聲色世俗尋常安可識  
相待出處古皆然莘渭依稀見遺迹

友竹軒為東吳呂氏作

幽人結交異凡俗平生愛此瀟湘綠醉日移栽閒地徧  
炎天坐倚清風足豈同踏雪覓寒梅不似休官為黃菊  
天際期看彩鳳下溪清或見蒼龍浴我昔間居大庾南

手執遺經向空谷幽懷獨與此君期肯使春花亂吟目  
風度年來久睽別世情日見多翻覆勁節不渝終比石  
清標言念溫如玉知君有意結歲寒嗟我無端動心曲  
何當騎馬造斯軒更為狂歌繼淇澳

松軒為曾處士作

傍山帶流卜幽居虬松偃蹇環軒除人間六月暑氣無  
天風盡日鳴笙竽幽人清姿比璫璵竭來松間隨所如  
開軒時還讀我書水光山色滿座隅興來歌詩聊自娛

意態藹藹春雲舒軒中景象何清虛  
栖遲偃仰樂有餘  
但恐當路聞清譽日邊有使來  
輶車君當出應明時需  
懔然就道無躊躇

羅浮高

羅浮山高高莫知其紀極  
矗然以孤峙去天纔咫尺雲  
霞變態不可名掩映長留萬古青  
勢侔五嶽通勾曲四  
遠相望如在目潛蒸二氣作甘霖  
萬物沾濡生意足三  
千六百丈四百十二峯  
鳥飛尚不過獸迹豈能窮  
專奇

擅勝奪神力巧成妙設虧天工我曾試一登絕頂凌天  
風彼滄溟之深若停潦諸山俯視猶蟻封羅浮山鎮茲  
東南何崔嵬羅山止其所浮山海上來羅耶浮耶終莫  
辨荒唐流說誰親見軒轅遺迹已成空葛洪丹竈封苔  
蘚但見石樓隱隱勢若企鐵橋斗絕難黃緣瀑布垂流  
三千仞湖波直與海潮連璇房七十二玲瓏曲折天然  
異亞虎巡山不啞人越雞五距飛還止羅浮之山足遊  
娛有林可樵溪可漁羨君住近山之麓襟帶雲霞水竹

居良田負郭課僮耕既看東作又西成得禾釀作酒如  
澠頽然醉倒復還醒推窓便對羅浮青白雲英英水泠  
泠雲英英以怡情水泠泠以濯纓隨取而足其誰與爭  
羅浮之山鍾靈孕秀不在君身在君後鳳毛已見薄青  
雲事業終當媿古人鄉園南望九千里為憶羅浮歌送  
君

湖山春意圖

我憶年纔十五六尋春幾涉羅浮麓艷杏夭桃簇曉紅

金芝瑤草和煙綠有時直上朱明巔目窮溟渤隘八埏  
間呼羽客酌雲液興來落筆詩千篇偶然名入丹桂籍  
西風吹上珠江船便從嶺海訪吳楚徧覽衡岱窮幽燕  
鵷班簞羽凡幾載宦途又向西南改山雲溪月想當年  
彷彿圖中見精采芙蓉削出天外峯漁舟帖帖湖涵空  
芳松新柳各生態依然桃杏爭春紅三茅此去諒不遠  
精脉應與羅浮通是誰卜築青巖下尚書猶子今曹公  
曹公平昔最知己十載京華多氣義外臺邂逅又同官

聚首論心欲忘寐與君同是倦遊人  
千里家山入夢頻  
安得王維輞川筆為我添入羅浮春

過梅關

未識梅關路今朝應馬行  
祠存賢相澤亭勒福泉名古  
寺藏林影清猿出洞聲親庭殊未遠  
回首不勝情

雲崖為同邑李生作

峭壁緣雲上心清雲亦閒  
山光濃淡處樹色有無間  
掃石延僧話開籠待鶴還  
何時經故里弭節共躋攀

壽豐城范處士

先生清隱處孺子昔曾遊山近雲生戶江空月映樓飛觴迎媚景展席俯清流軒冕元無夢何須范蠡舟

贈鄭璧潤錢唐訓導

聖主崇文教儒官簡俊才日邊鳴鐸去秋盡講帷開化雨舒桃李光風被草萊題詩思令弟憑雁寄金臺

登五華寺曠怡樓

路入滇城北蕭然景象幽偶尋名勝地因上曠怡樓雨



霽千山色松聲四座秋始知人世上亦自有丹丘

正統癸亥營建紀成十四韻

昭代承平日車書萬國同華夷歌至德民物固淳風土  
宇今何廣京師古所崇龍飛乘大運鳩聚役羣工郢也  
操戕斧垂哉立斲礱經營來子庶奄忽見神功日月光  
三殿乾坤闢兩宮詞司星拱北庶府水朝東撲地檐楹  
衆參天棟宇隆螭頭蹲霧豹珠網絢朝紅大勢千秋壯  
宏規百度雄巍莪齊景毫輝赫過岐豐帝業垂無極人

心仰建中賦詩紀成績三祝效呼嵩

秋江晚眺圖十三韻

看君圖畫裏秋意浩無窮水遠天涵碧林疎霞映紅懸  
蘿低拂石古木上撐空顥氣初過雨晴嵐不動風舟閒  
依草薄亭寂閔榛叢僧寺浮雲外人家落照中翠柿零  
岸葦丹密變江楓遠字聯寒雁危橋隱暮虹地蟠山矗  
矗天杳樹濛濛眺遠秋容淡尋幽野興濃乍疑牛渚客  
又似鹿門翁咫尺窮佳致尋常見化工金陵秋色晚風

景宛然同

春日山中寄懷岳季方兼東潘源之金本清

一榻高懸閱歲時東風還有故人期  
小桃原野春風早幽竹門牆夜月遲  
道在只甘顏子樂時平肯作賈生悲  
雲山翠合衡茅近日暮猶聞歌紫芝

送陳貢士入南京太學將歸杭州

蜚英誰道困文場玉陛親題御墨香  
千里客程趨白下五更鄉夢憶錢塘  
吳山欲雨雲連屋浙水將潮月滿航

知爾久懷經濟術早敷長策獻明光

送何宗易郎中改官南京

東風嫋嫋鳳城春萬里鄉還此送君  
明晦有期東海月卷舒無意北山雲  
翠交庭草閒中趣白戰詩題醉後分  
飯有魚羹隨處樂臨岐何用歎離羣

經訓堂

一畝栖雲靜不譁日依鉛槧作生涯  
瀾翻學海頻移棹稼獲情田已滿車  
問字盡過揚子宅藏書應擬鄴侯家

先生盡日橫經坐不覺秋霜點鬢華

黃鶴樓圖為岑知府題

黃鶴高樓迹已蕪誰傳景象入斯圖仙人一去世莫識  
黃鶴不來誰為呼鄂渚春回湘樹匝洞庭雲盡楚山孤  
題詩獨羨崔夫子對景思鄉信不無

安隆旅次

路入安隆幾日程峯巒分合鬱層層湍流喧鼓客愁聽  
峻石攢鋒人倦登隙地有茅家有鬼好山無寺俗無僧

愁心此日偏懷闕暫止肩輿上竹棚

途中漫興

櫻桃郁李間山茶二月西行飽看花  
雨暗鼠場孤客館煙橫猪洞幾人家  
路盤谷口泥偏滑城繞山頭堞盡斜  
弭節不勝回首處五雲東北是京華

九日

往年當此日曾壽菊花觴今日東籬下  
看花淚滿裳

憶故園兄弟

故園兄與弟一別又經秋昨夜相思夢分明到廣州

題竹贈人

嶺外冰霜操同盟幾歲寒持將贈君去莫作畫圖看

夜雨

夜雨空窓外時聞滴滴聲羈人心萬里歌枕到天明

泛舟遊峽中

兩岸樹交加羣峯散紫霞武陵何處是流水出桃花

昭君曲二首

含情辭漢宮一去天萬里欲寫琵琶詞無由獻天子  
遠嫁單于庭自為漢人語忽憶在宮時潸然淚如雨

古意

君恩江上波妾心雲中月波流自東西月光終不滅

別汪用璋

青青官柳覆行驂樽酒逢君強笑談鄉信欲書還閣筆  
憑君傳語到天南

灤州道中二首



幽谷春深暖尚遙，挾陰殘雪未全消。  
野禽似解吟邊意，飛傍肩輿過石橋。

又

山徑崎嶇路轉賒，隔林時見野人家。  
風光信與天南別，三月溪桃未著花。

哭友人

詩學南庠舊有名，上游連業盡蜚英。  
傷情一夜西風急，吹散吾伊作些聲。

秋日沙嶺

石磴綠雲遶亂峯行行疑在半天中  
馬前轉覺秋容老  
霜葉如花觸處紅

牧馬圖

草細泉香野色新  
五花驕氣散春雲  
昂頭似憶當年事  
立仗凌雲夜正分

牧牛詞

曉光晴逗林霏滅  
烏犍踏破春郊雪  
升沈榮辱耳不聞

橫笛一聲山石裂

石倉歷代詩選卷三百八十

欽定四庫全書

石倉歷代詩選卷三百八十一

明 曹學佺 編

明詩次集十五

李賢

和陶詩停雲四章

瞻彼停雲載風載雨有懷伊人道遠且阻慨彼莫邪燈  
前獨撫寄興寥寥黯然凝佇

金匱要略卷三十八  
停雲旣濃零雨其濛懷我良人阻海與江明月何來照  
我軒窓願言相憶不遐以從

商顏之老言采其榮與子相聞不以過情矢心亦云各  
勉于征庶幾令終無忝厥生

彼蒼者松不改其柯矧伊人矣保此天和保天之和于  
我求多子不我輔將如之何

榮木二章

榮木悠悠春光在茲宛其悴矣孰能戀之今我不樂將

復何時光陰之速瞬息乎而

榮木欣欣雨露培根天之生物栽者斯存而我何為棲  
此衡門由由與偕薄夫為敦

遊斜川

新春景候佳正宜行樂休因之偕朋侶去作斜川遊淡  
淡山色遠漾漾波光流弱苔鳴翠羽淺浪翻白鷗撫景  
意俱豁寧須問蓬丘挈榼有隣叟攜琴得良儔詩篇互  
賡詠酒杯同勸酬不知春事繁再得遊此不愜茲川上

樂忘彼身外憂既醉各歸去曠然奚所求

連雨獨飲

秋來鮮晴日陰雨何蕭然濁醪自斟酌寄興天地間  
酒中有真樂何必更慕仙我祖昔感夢八翼俄登天  
餘床既垂後功業孰繼先余生時不遇暫出而即還  
所賴一壺酒陶然樂餘年既今復懷昔此意誰同言

和郭主簿

長夏罕人事移榻坐柳陰清風時復來為我滌煩襟  
因

之步幽逕呼童攜素琴雅懷當如何在古亦若今留侯  
善藏用高風吾所欽床頭酒已熟與子聊共斟古來豪  
傑士幾人遇知音愛此林泉居吾已投吾簪懷君對明  
月情同江水深

和胡西曹贈顧戎曹

仲夏宿雨收當晨送輕颺杖履陟丘隴涼氣襲我衣清  
興悠然生因之歷翠微茫茫宇宙間不能忘憂葵尚念  
魯中叟鳳德何其衰空有奮揚志未得天戈揮魚龍失



雲水非由見事遲達人能悟此撫志良足悲

辛丑歲七月赴假還江陵夜行途中

青年志已乖甘心在沈冥田園有真樂雲路無宦情茲  
焉將安之前途渺榛荆不仕恐無義聊復念蒼生蒼生  
未蘇息何時覩文明乃今成大謬此恨安得平紛紛馳  
車走上下方交征君子當見幾云胡不歸耕北窓延清  
風吟懷無別縈人生貴適意何必身後名

有會而作

我室類懸磬稚子恒啼饑豐歲常窘食瘠軀那得肥傷  
哉古之人淒涼泣牛衣此事若親覩此情良足悲窮達  
固有命奚論是與非豈無子孫慮顧今將何遺懷彼鹿  
門隱誓將與同歸去去龐德公真為百世師

擬古

憶昔送君日折贈門前柳黯然離緒牽別來已云久嗟  
彼市道交念此金蘭友願為秋暮期同醉菊花酒古人  
重然諾斯言莫違負相思意何長相見情更厚世態趨

炎涼君心諒無有

丙辰歲八月中于下溪田舍

我有下溪田近在南山隈  
竭此耕作勞晏安非所懷  
今焉歲云熟西獲願已諧  
飛飛田間雀喔喔林外雞  
遠村夕陽下高樹涼飈迴  
我懷古賢哲貧賤亦可哀  
人生憂患多胸懷何時開  
余茲老田畝心事任摧頽  
唐虞去已遠吾道一何乖  
匪慕鴻鵠舉聊學鷦鷯栖

擬古

遊學苦不早登科苦不遲雖有聖賢質亦為物所移況  
我中人下寧敢慕不羈苟無殷勤志衆欲以之随仰愧  
而俯忤于道已相離一善不足稱富貴將何為

美人隔秋水

美人隔秋水欲渡無舟航清波泛明月對此空斷腸耿  
耿見牛女河漢在中央誰云七夕會無乃謬且狂託物  
感情興水上雙鴛鴦動止不盈尺物性固其常在人良  
不異云胡各一方寒燈照孤寢淚下霑衣裳

出金陵江口阻潮

疋馬出金陵冠蓋雜途擁日落到江東官舍頗清迥秋  
月當窓明永夜霜氣重孤榻不成眠一雁度寒隴艤船  
欲渡江潮勢兼天湧須臾波浪平百艚相曳踵嘔啞響  
中流舉目神驚悚安得在周行我命若膠鞁

雍熙寺書

維揚逢小春葉落散空宇寂莫寄雍熙悲鄉淚如雨何  
以慰我心燈下援琴撫知音苦未逢芳華為誰吐

呂梁洪遇風

客程過呂梁大風折桅子洪濤衝舟橫一命輕如紙牽  
攀泊崖下相顧戰而泚人生百年間出處不相似老樗  
卧空山流槎行萬里勞逸何不同分固當如此展席坐  
蓬窓須臾風亦止

題畫

方圖展佳趣二客空山遊峯迴石路轉籟息林壑幽斷  
岸鎖煙蘿陰澗鳴琳球蒼頭空翠濕屐齒苔痕留百折

度崎嶇千尺看飛流殘月墮屏嶂枯松挂猿猴溪雲涼  
帶雨山色淨含秋霜重丹楓落巖深嵐氣浮太行歷危  
險羊腸任夷猶蜀道古云難攀緣竟何求遙知飛鳥倦  
疑聞杜鵑愁崔嵬到絕頂高寒透重裘飄然發遐想俯  
仰豁吟眸會當逢仙子攜手訪丹丘

秋夜

秋夜有餘清耿耿不能寐出戶涼意來四野星河墮露  
氣濕衣裳茫茫宇宙長凌空不可得歸來倒書牀記書

已成念波冷湘筠簟撫景沒吟魂得句還重鍊須臾天  
山月一鏡渾無缺坐落半窓明對之心愈潔雜慮何由  
生東方云旣白

金臺惜別

王河隄上楊花飛王河隄外客西歸晚色蒼蒼慘別恨  
東風蕩蕩吹征衣昔君從父涼州謫回首家山邈胡越  
塞間驚回旅夢孤杜鵑啼破邊城月邊城月缺復圓月  
光常照玉門闕對月空教動鄉思西陲萬里何時還翻



懷親友司封客生長相違重堪惜攜琴命駕上京華聚  
首開懷論疇昔親情契合未云久官舍匆匆又分手煙  
光二月薊城春祖餞一樽燕市酒行旌遙指夕陽西驛  
路青山足品題雨霽函關吟處好雲連秦樹望中迷我  
聞君子擅文武剩有奇謀禦戎虜立志休同燕頤流致  
身期與嫖姚伍他年霄漢重相逢當時故舊歡無窮皇  
家金石賜不薄願言壯歲收邊功

送張尹之江陰

江陰勝槩接湖海水國名鄉富魚蟹張侯釋褐綰銅章  
父老欣傳得賢宰秋風潞水片帆輕淮月當空夜正明  
北固雲開楓樹曉翠光亭古山禽鳴襟懷皎皎冰壺潔  
寮案相從盡相悅百里春風錦製新一簾化雨民冤雪  
卓魯芳蹤良可追德政行看聖主知他時有待徵書至  
還擬承恩向玉墀

聽琴

銀河耿耿月華涼有客對坐琴一張金徽玉軫聯輝光

拂髯舉指彈清商漆園春夢蝶飛揚花底唼唼雙鳳皇  
碧霄嘹唳孤鶴翔四壁唧唧鳴寒蛩鳴咽流泉出澗忙  
萬壑爽籟發笙簧古戍悲角曉帶霜洞庭秋漲波茫茫  
巴峽驚湍激石礪突然鐵馬鳴刀鎗長隄柳絮隨顛狂  
珠林石鼎沸蘭湯雪花六出紛呈祥平波雁落滿江鄉  
喧啾百鳥忽軒昂下流奔急見飛航萬峯瀑布千尺強  
雷電交作雨霏霂挺然松竹共蒼蒼壯哉不屈百鍊鋼  
引雛江燕語危檣梧桐飄葉墮銀床幽谷叢蘭自芬芳

八鸞雲漢聲鏘鏘離騷忠憤志堪傷孤臣孽子意相將  
在陳絕糧興慨慷演易姜里憂思長肅然環珮步巖廊  
闕闕鳩鳥在洲傍觸目感雉飛來雙慟回命短沾衣裳  
英雄蓋世歸劒鉞三命益恭走循牆聖謨洋洋嘉言彰  
虞廷賡歌際明良千載遺音幸不亡豈云冰炭置人腸  
棲鸞之桐出嶧陽法象天地圓與方昔聞孔子學師襄  
杏壇函丈日徜徉爨下焦尾聲琅琅知音爭似蔡中郎  
正聲感我塵慮忘藹然和氣在中央煩君為我收錦囊

來日還銷一瓣香

擣衣篇

擣衣向中宵銀河月色饒處處砧聲急家家戍卒遙戍  
卒遙幾千里霜砧斷續聲不已展轉孤衾夢未成風送  
愁聲入人耳閨情感此淚雙落明月流輝照沙漠寒衣  
寄得到邊城朔雪苦寒衣正薄

城上烏

城上烏啼月將落城外秋風起寥廓烏聲啼罷露華晞

草樹蒼涼曙光薄都門車馬集如雲離筵勸酒何殷勤  
酒闌人去棹歌發明日烏啼何處聞

行路難

行路難難更苦孤影飄飄無定所關河迢遞渺天涯長  
風吹夢歸鄉土亂石灘中一葉舟江心白浪風颭颭  
閣崔巍連鳥道縈紆詰屈心煩愁行路難難更險歲月  
無情何冉冉山頭夕照樹千行天外秋光鴻數點對景  
增離憂莫作汗漫遊百樣艱辛在行路不如高卧藏林

丘

題卧龍圖

漢家神器風波舟，奸雄環顧涎欲流。  
斯時誰有匡扶具，南陽嘉遜阿衡儔。  
帝室之胄何英偉，草廬三顧驚神鬼。  
幡然感激釋耕耘，一旦君臣若魚水。  
鼎分畢竟不能休，務償初志復神州。  
永安遺恨抱終古，出師二表殫嘉猷。  
錦水祠堂宛如故，劒閣荒蕪流馬路。  
七擒南徼讐天威，八陣夔城訝神護。  
營中星殞渭濱秋，五丈原頭殺氣收。

歸櫬猶能走仲達運移漢祚終難留英雄千載空惆悵  
商周人物能多讓世間成敗不足憑卧龍遺址人爭訪

盧溝曉月

金鷄唱徹扶桑曉殘月娟娟挂林杪長河斜抱鳳城西  
流彩遙連碧波杳橫橋遠亘如遊龍明珠影落長河中  
桂魄千層琥珀瑩蟾光萬頃玻璃同霜葉飄飄綴馬鬣  
沙河閃爍黃金屑蘆荻聲脆風力寒煙霏繞上銀河減  
往來幾暇曾一臨碧波渺渺蘆花深千官振轡發歸騎



月華猶在西山岑

深居

避世尋幽隱山行十二峯茅簷翠竹合石逕碧苔封溪  
漲一川雨林深千尺松遙聞漁父唱未得恣相逢

入澗有作

谷裏誰來往林深一徑通猿啼常對月虎嘯自生風霧  
重溪流暗雲濃葉落紅何時歸北澗漁舫任西東

夜雪

瑞雪紛紛落殘燈半夜餘獨憐為客日重看古人書夢  
覺憂還集詩成樂自如遙思乘興客風細片帆舒

### 山水圖

天然真景趣畫史信多能傍壁雙枯樹臨流一老僧煙  
光溪上結雲氣嶺頭蒸遙望山中寺孤峯第幾層

### 過后山

山程渺渺去曉色尚熹微野鶴穿松徑殘花點客衣溪  
魚當鏡躍山鳥近人飛却憶漁郎說桃源果是非

送法師住慈恩

故人從此去樽酒莫頻催  
臘雪猶堆嶺春風已放梅  
交情留倡別疎景入詩來  
想到南山寺纔逢柳眼開

題畫

久隔江山景何人寫此圖  
寒流如渭水秋色似成都  
恍聽幽禽語疑聞野鶴呼  
不知煙霧裏還有隱君無

除夜書懷

使節淹淮甸殘冬謝早春  
揚州除夜客湍水未歸人  
歌

管千家樂琴書旅舍貧鄉懷從此切清淚欲沾巾

送別歸浙

駐馬離亭花亂飛傷情忍與故人違金臺別酒添行色  
潞渚歸帆帶落暉嶺上春風梅子嫩山中暮雨蕨芽肥  
謾從浙水經行處為訪嚴陵舊釣磯

送練士者回鄧州

足馬南回歲已秋離亭分手莫淹留山村月夜雞鳴早  
野樹霜天葉落稠驛路牙旗迎故壘孤城畫角擁高樓

到家盛吐籬邊菊樽酒親朋樂獻酬

遊大勝寺賡壁間詩韻

白雲繚繞四圍山十里松陰始扣關  
石澗風篁偏引興雲房清話暫乘閒  
山頭野鹿銜花至月下高僧洗鉢還  
明發歸程朝雨淨紉園回首翠屏間

穰侯塚

秦相當年擅寵光空餘孤塚傍金湯  
秋風兔穴通黃壤落日烏棲滿白楊  
石馬有聲寒雨急豐碑無字綠苔荒

可憐富貴今如此莫訝雍琴感慨長

送無隱和尚

早通禪教息遊方獨占名山歲月長  
千片浮雲春補衲一龕明月夜焚香  
曉簾花雨清金界午院松風淨石牀  
塵外真空心似水叢林無事任徜徉

再賡大勝寺壁間韻

寶刹從來近好山溪頭馴虎護禪關  
竹窓雨過清陰密松院雲深白晝閒  
崖巢經霜猿共摘楓林欲暮鳥知還

試從老衲談空妙大智燈光滿坐間

秦淮次韻

秦淮南盡石頭城淮上帆檣似葉輕秋浦蓼風歌旅況  
春波殘月棹殘更數行白雁沙邊落一抹青山岸上橫  
自是名川多滯集滔滔終古見澄清

途次偶成

王事驅馳分所宜雲程千里思依依菊花香冷迎霜綻  
鴻雁聲殘帶雨飛古渡扁舟隨處少遠山羣木望中稀

徐行莫訝前途晚  
村市人家晝掩扉

河內鄉村

清陰十里看修篁  
村市人家倚太行  
屋後分畦葵葉嫩  
門前流水稻花香  
秋林有葉皆堪摘  
春酒無肴亦可嘗  
此地居民歡樂足  
他時歸老定難忘

濟源

四面嵐光列翠峯  
懷州西畔有奇蹤  
羊腸路險中原隔  
濟瀆源深北海通  
盤谷高風歸李愿  
太行遺事慕梁公



我來遊覽逢秋暮煙景蕭條落照中

謁華嶽廟

華嶽巍巍勢獨雄層霄削出翠芙蓉紅光映日仙人掌  
黛色連天玉女峯絕頂泉飛千尺練懸崖根固萬年松  
四時賴爾興雲雨歷代尊崇祀典隆

過長安故城

長安千載故城荒曲潦寒蕪滿未央廢宅總成芳草地  
寢園一任野花香連村何處藏溫室啼鳥渾如覓建章

惟有當年原上塚，累累猶自對斜陽。

和許氏咸陽晚眺韻

咸陽回首暮雲愁，煙鎖蘆花遠近洲。  
古渡馴鷗依短棹，夕陽歸鳥過危樓。  
道傍故苑風霜冷，原上諸陵草樹秋。  
多少英雄俱寂寞，渭河依舊水東流。

過五丁峽

五丁峽在漢江西，萬仞高峯兩岸齊。  
鑿斷懸崖通鳥道，疏通流水上雲梯。  
馬頭惟見千山合，澗底都教萬樹迷。

路險不知天色暮金牛嶺畔聽猿啼

再和人韻

秋風畫角起邊城雲路功名歎未成山鳥飛來青嶂遠  
沙鷗泛處綠波平松庭皓月分清影野寺疎鐘度晚聲  
千里客懷今夜夢鄉園歸去定分明

和寄薛大理詩韻

秋來乘興憶山陰客邸長吟思不禁天外聲寒鴻列陣  
籬邊香冷菊垂金青年學道功名薄白首論文歲月深

別後但憂成鄙吝敢虧忠孝一生心

賡薛學士詩韻

玉堂無事坐清暉柳絮因風作雪飛  
紫禁鶯聲晴後滑赤霄雲葉午前稀  
兔毫間運成珠玉雞舌長含侍瑣闥  
慙顧非才膺寵渥中官又報賜新衣

自君之出矣

自君之出矣屈指算途程遙知霜降後行李到邊營

又

自君之出矣明月長滿窓妾心似明月不用對銀缸

題畫

素花香遶翠玲瓏石鎖蒼苔隱綠叢枝上寒臯窺錦雉  
羽毛驚動白蘋風

雲嵐深處數椽幽松下柴門對碧流記得山窓清夢破  
落花香裏雨初收

石倉歷代詩選卷三百八十一